

淮寧縣志第七冊

淮寧縣志卷之十九

辛酉科舉人河南陳州府淮寧縣知縣永銘纂修
人物傳

國朝

季之駿道統孫也明崇禎庚辰進士順治丙戌任戶部主事授南昌知府政事文章並有名海內著家乘萬餘言邑人宗之

錢象乾邑諸生明末土寇劫掠象乾糾義士徐秉鉞守護一方以子騰雲貴封昭勇將軍舉鄉飲大賔年九十七歲卒

淮寧縣志卷之十九

人物

一

李皓字伍四州人順治庚子舉人授新野教諭陞河南府教授初皓生明季遭寇難父養素守城以殉皓負母逃匿荒榛中覓遺粒食母亂定歸里得父尸葬祖塋結廬其側晝力田供母夜借書誦讀爲諸生設館二十餘年貧乏者不取束金多方造就新野孝廉喬大任河南府進士張起鶴皆皓秉鐸時所力成也性甘淡泊耻干謁事母孝年七十三猶若孺慕焉錢騰雲字映斗貌若蹲虎能開十石弓又雅善書法明末中州盜起撫軍高明衡辟爲叅軍俾統兵征河北陰募壯士作馬賈裝入賊營市馬縛其魁張天則

等兩河平高公特薦都城已陷明年太傅王之綱開募府薦雲於豫王指畫機宜豫王大悅授以淮海副使順治乙酉舉鄉薦己丑成進士庚寅授江南鷹揚衛守備衛故衝劇監督有方糧艘先期抵通繼奉令轄四十衛運務復先期至無有侵耗監修和州烏江渡焦湖堤不乘不蓋工程堅完民賴安堵總曹蔡公論功優叙加三等陞湖廣全省都指揮使朝命釐定官職改爲掌印都使司恭遇

覃恩授階昭勇將軍誥封祖考如官蔭一子入監讀書壬寅山西寇李來亨游魂蜀楚五省會勦雲轉輸

淮寧縣志卷之十九

人物

二

糧糗三百餘萬石民不困役事平錄軍功五溪蠻覃印昌等侵施州監利田數千頃民愬於朝委雲勘鞫令苗毀民券絕侵佔之根復疆理之舊苗民帖服癸丑吳逆叛全楚騷動藩臬闕官以都閫攝方伯事王師雲集議戰議守刑兵錢穀日昃不遑越明年己未又署理巡撫事大將軍順城王知其功題補荆岳水師總兵晉贈榮祿大夫賜正一品服色因火藥局災調江西副將以年老告歸年八十一歲卒子巍業字鶴臯以父騰雲軍功恩蔭入監肄業期滿授廣東長樂縣知縣剛直不阿謝絕請托民有孝肅之歌丁艱

歸里服闋補福建寧德縣知縣滑吏斂迹調臺灣縣知縣以戇直不合上憲意遂解組歸姪若水任德興縣知縣

丁昌祚字純宇孝行特著流寇猖獗昌祚遇賊與賊角賊衆至縛昌祚并妻朱氏賊怒甚將殺焉昌祚曰吾夫妻死卽死耳不能爲不義屈何怒爲賊壯之釋去歸里後田地荆棘居民倉惶昌祚授貲倡耕鄉人賴焉施己貲助婚葬之不給者甚衆州牧舉鄉飲介賓年八十八卒

丁琮字協公太學生考授州同明季流寇破陳琮甫

淮寧縣志卷之十九

人物

三

九齡數遇賊不死母歿于亂失其處琮悲泣終身奉父及繼母以孝聞待親族故舊有恩城北辨穀臺祠圯琮曰先代始爲飲食者先聖猶食不敢忘况吾輩乎倡衆新之文廟左捐基地一段廟前植柏成列脩關津道路設義塚葬孤貧多有可述與人交終始如一不以盛衰存亡易心晚年好名人詩文皆採錄成帙年八十餘猶午夜讀易所著有尙志堂集

吳邦泰字景陽爲人勇敢仗義明季闖賊破城時吳氏舉族多被害邦泰怒手提刀與賊戰罵不絕口且戰且走至月波寺賊衆不能支中傷頭顱邦泰躍入

月波寺水中夜半出水裂死人衣巾裏傷處流血遍
體至家寂無一人出城提刀直前賊問云你是曹營
是宋營以爲賊黨也邦泰漫應之曰曹營遂脫難至
吳家堂關帝廟傷重不能行賴僧人元明調治得愈
賊去後赴七里河老庄覓其族人僅得一弟安泰甫
七歲一子一族孫皆六歲又有鄰里幼童胡會圖楊
小樓李明輿等邦泰皆收養之携以避難譚家寨賊
平又訪兄開泰于項城與同歸合巹晚年惟課子孫
讀書姪庸敬孫苞皆入庠姪孫必恭中康熙己卯舉
人曾孫蒼曉等亦列巹序至今吳氏子孫繁衍者皆

淮寧縣志卷之十九

人物

四

邦泰一人撫育之力也胡李二人既長各令歸宗又
爲楊小樓娶妻買順河村地授居焉一日詔子姪等
于庭曰我將逝矣日終無疾而卒年八十四
徐時魁字敬嵩指揮時準弟有膽力善騎射陳自闖
賊後土寇迭亂時魁率衆驅逐遇監生賈克壯尙幼
爲僕李姓背負逃竄時魁携家中保全之後妻以女
堂姪庠生徐秉翼困於賊亦時魁救出得不死今二
族子孫熾盛皆時魁力也年八十九學憲陳旌其門
武澄清白如玉胡守謙皆州鄉約也明季闖賊破陳
後衙舍盡毀城內無居民澄清糾鄉人補葺城垣聚

至十字街宣講訓諭如玉又率衆修理衙署城中無貿易守謙會鄉民糶賣治生民各安業

賈希灝州人明末兵燹之後合族離散僅存堂姪克壯及堂妹希灝撫育婚嫁之又修東關路施東門茶康熙三十七年州牧張舉爲介賔

朱邦秀字文宇爲人簡厚不議人短長延師課子先德行後文藝濟貧周急不可枚舉歿後數十年有老叟踵門償逋子若孫不知爲誰何亦不受也以子晷贈奉直大夫

劉灝字太素順治戊子舉人性恬靜童子時有文名

淮寧縣志卷之十九

人物

五

鄉薦後益肆于學終身不治生產惟以訓迪後進爲事學德兼茂士林師之

徐秉鉞州人明季兵亂秉鉞糾衆保守鄉村撫養親族之孤立者又好修橋梁道路知州張喆旌之舉爲介賔

孫可玉州人順治五年堤決水溢可玉禱于龍王廟水落捐金修廟又建戴家集大橋修路十餘里鄉黨稱之

錢萬選騰雲仲弟有文武材善馳射工書法中順治甲午武舉乙未成進士任江南潁川衛守備季弟騰

鳳中順治己酉武舉

孫式字亦菴世族也父可玉故好施母王往往典簪珥以周貧乏式克承其志弟應龍幼孤無依招與同居及長爲擇配完婚與田百畝歲饑鄰里借券約三百餘金盡焚之性尤穎異爲文深峻奧博試輒冠軍於書多所淹貫尤邃春秋工鍾王筆法著有六息齋詩草終於明經以子常贈奉政大夫

劉三省邑人素勇健從提督郎征吳逆接戰七日未嘗火食權授轅門千總徵兵河南三省過里門不入私室主帥嘉之授千總以親歿子幼歸里尋卒

淮寧縣志卷之十九

人物

六

蘇名卿字价藩康熙甲子武舉潼關衛守備興學校勸農桑獎節孝立義館辛丑歲大歉斗米直白金兩餘大興等寨數千民置裝欲逃名卿留之而倉廩空虛乃解囊按戶口各給兩月糧民始安籍丁酉閩邑民變調兵勦捕其民扶老携幼男婦雜踏叩關籲救者數千人本道恐有不測閉關不納名卿惻然力請開關安置寺觀及民間空屋中按戶給糧數月閩邑平乃令歸籍治潼衛十八年政修化洽民皆稱爲蘇召杜後衛缺裁告歸紳民擁送百里外洒淚立碑誌甘棠焉

高維嶽字駿生康熙己酉膺鄉薦居里塾課諸生性剛方見事不平挺身持公義爲之申理濟貧恤孤借貸不責償康熙十八年出粟濟飢後仕臨高知縣時民多流亡黎洞負固維嶽招撫安集百姓復業黎洞歸化興學立教三年中風俗悉變未幾病卒祀鄉賢雷永鳴字先聲廩貢生稽古好學天性純篤少孤每逢父母忌辰輒流涕明崇禎末李賊攻城叔恒守西門城陷氣絕于城樓永鳴率僕佃負其叔歸救治得甦州牧孫芳設義學延永鳴爲師多所成就任葉縣訓導教先德行後文藝葉邑士子登賢書成進士者

淮寧縣志卷之十九

人物

七

十餘人上憲獎之年七十告歸葉人猶踵門問字焉卒年八十三著有四書講義五經講義藏于家吳方字正公幼孤育於繼母母賢方亦善體親志晝夜勤學僉點守城寒夜衣敝履穿猶持香火照讀書巡官見而異之爲除其籍童試冠軍入庠食餼爲人端方廉介文章醇雅能詩歌善鼓琴靜夜焚香一彈再鼓優游自適家貧授徒供母束脯外從不受人餽遺母病臥榻前夜半視聲息候起居累月不寐及殁形骸骨立哀感路人嗣是絕意進取以明經終萬如洛字滙菴祖世顯明進士南京禮部主事父巍

歲貢生遭明季亂家道中落貧不能給衣食如洛七
歲失怙弱且病欲讀書長兄止之兄歿後始折節下
帷艱辛備歷志不少挫年二十三入庠後六年選拔
入太學性嚴肅雖盛暑衣冠危坐終日不少懈端謹
廉靜言動不苟城居三十年不一入市屢士人推重
居家事母孝母體微不安隆冬盛寒夜聽戶外不敢
寢並廢飲食母卒哀毀盡禮父母忌辰必徒步哭泣
拜墓終其身性更友愛館穀必分給兄弟長于詩古
文詞初貢太學太守憐其貧遺之金不受讀書守正
窮約中怡如也著有香草亭詩京雒吟衡門集衡門

淮寧縣志卷之十九

人物

八

新稿纂四書講義古今文未成卷帙而歿學者惜之
李若楠皓子字南仲工制舉業入泮第一中康熙癸
酉舉人敦孝友重任卹父宦游時若楠居家奉祖母
盡孝後知江西長寧縣父歿服闋將補官不忍離母
出仕外大母年老無子楠迎養以悅母志母歿哀動
鄰里家事必聽命于兄分產時兄已故莊田讓弟姪
撫育族子課讀以成其名宗族之死者經理其喪嫡
叔進學年十歲遭寇出亡後訪知爲廣西全州叅將
其後人占籍廣西若楠始通音問終以不得一見爲
恨雍正庚戌夏叔之曾孫孚達赴都試禮闈紆道

里若楠已患疾不起執手永訣其孝友實天性也
蘇應元字仁寰淮邑舊族慷慨重氣節弱冠闖冠屠
陳艱辛流離奉父母無間色養旋里後敦子職尚義
周急扶危康熙己丑歲歉捐貲給粥疫厲復行延醫
製藥多所全活陳故病食淮鹽應元協力白上憲除
之出數百金助修太昊陵周圍大城舉鄉飲大賔以
子名俊封奉政大夫名俊字翌皇警敏有膽智遇事
敢言接物和而有禮早食餼以急公候補同知陳先
立里長甚爲民累俊白州牧申上憲改爲滾單邑人
感之

淮寧縣志卷之十九

人物

九

季一德字純如由諸生貢入太學初任偃師儒學陞
萊陽知縣潔己奉公勤教養慎刑獄康熙五十五年
運餉至郭多里窮荒絕域往還萬餘里由此致疾告
歸卒

朱晷字斗瞻爲諸生時有盛德以歲貢任武陟教諭
再補孟縣教諭陞繁昌縣爲政敏捷案無留牘宣城
民婦以眞命沉寃蕪湖民以墳山結訟累年不決中
丞委勘一訊而白居十年擢蒲州知州履任時積逋
不施鞭扑蒲民完納又鹽引積累爲捐俸償之在任
五年告歸卒葬之日蒲士民來陳哭墓者數百人以

子鴻緒贈奉政大夫緒鴻字森菴號松亭由貢生授揚州府同知興利除害民呼爲朱青天以丁父艱將去士民籲請在任終制大吏不可公尤切止之衆爲之罷市者五日比其行也送舟蔽江幾不得前服闋補建昌府同知擢鳳陽府知府遷福建臺灣道尋改汀漳道罷任清釐江南逋賦事竣授吏部考功司郎中復知順德府遷湖廣鄖襄道改廣西右江道復改直隸霸昌道歷官二十餘年以年老歸

萬如濟字禹淪世顯之孫少聰慧年十三父卒奉母王氏備極色養時家道中落年十六始折節讀書二

淮寧縣志卷之十九

人物

十

十一補博士弟子員壬午登賢書己丑成進士知開原縣開故邊徼地瘠民貧逋賦千百餘家濟詳請豁免民困以蘇其所興革務合人情遷戶部四川司主事未涖任而卒居官八載囊橐蕭然所著述有辨惑錄粵東游草

蘇名庭字綸掌以能書名早游泮司鐸邳縣遷貴州施秉知縣邑當孔道地瘠民貧往來供支不勞民力以病予告卒于家

蘇名傑字漢三生而岐嶷才畧過人初知山東陽穀縣撫民禮士教養並舉賑荒饑剖獄訟邑號神明

聖祖南巡賜詩綾扇各一以旌之擢員外郎丁父艱
回籍廬墓被溺而歿郡人士咸爲嗟悼

蘇名勲字彤獻貢生授柘城教諭擢直隸唐縣知縣
歲稔出倉穀減價平糶民賴以濟子牙河決田廬滄
沒勲捐俸造水車百兩放水歸河唐民無水患鹽價
昂貴不便於民勲急令平價民便之才能大著累遷
主事員外郎雍正癸卯發川省以知府用召

見時

賜克食奶茶貂皮勲卽日就道抵川委辦打箭爐糧
務合上憲意補順慶知府受事後釐剔弊端嚴革重

淮寧縣志卷之十九

人物

十一

派三載卒于官櫬歸士民瓣香泣送者甚衆至今德
之

蘇名弼字梅峯弱冠入庠貢太學循例授湖南瀏陽
知縣多善政受知上官丁父艱旋里廬墓三年服除
再補廣西陸川縣邑有十八堡三十六墟冬季貨集
無論紬布米鹽等物在墟市易者富豪十取其三名
曰抽墟名弼詳請勒石永禁陸民感之年踰六十告
歸居鄉遇歉歲捐資助賑州牧黃旌曰豈弟長存八
十六歲卒長子銑例授縣丞次子鉉別有傳鈐襄城
千總鑑雍正癸丑武進士銅沛營守備

孫常字大年中康熙己卯第三人庚辰成進士除湖廣棗陽知縣邑近山谷多盜常廉得其實悉置之法乃減火耗革陋規民大悅服擢吏部文選司主事累遷驗封郎中因前任事被議冢宰保留得不去壬寅改文選郎中以父喪歸服闋再補考功郎中京察時各部院卷案叢集冢宰悉委任益矢公愼是年常列優等第一奉

命盤直隸倉穀卻餽遺在部時定禁陝西私錢稿上嘉納之傳示九卿科道曰凡爲國家辦事當以此爲法丁未揀發雲南補永昌知府賦稅繁冗苗民雜

淮寧縣志卷之十九

人物

十二

處乃悉立定額除濫征之害所屬土司餽遺一介不取撫綏三年循聲大著總督薦授驛鹽道章未下而卒士民苗蠻奔走號泣有送至百里外慟哭而歸者至今尸祝之

高培字仲益明敏有幹濟初知福建建安縣有德政遷雲南曲靖同知兼理黑鹽井提舉再署趙州篆戒奢清弊商民饒裕遷鎮沅知府府新設猓性難馴雍正十年猓忽變將寇鎮沅衆惶懼培曰守死殉難吾分也爾等任所適衆感泣誓守猓聞有備而退後歸林下十餘年八十歲卒

高驊貢生字雲驤鄉賢維嶽之仲子也性孝友好善父卒於官事母竭盡孝養嫂李氏寡居守志驊爲之請旌與弟驥同心爲善怡怡無間族叔允迪易簣時子有龍甫七歲托孤於驊密授十餘金囑其經營撫孤歷二十餘年積至一百七十餘金驊爲有龍援例入太學所餘貲盡付之而有龍母子不知也驊告以故乃大驚有龍母子感激泣下乾隆七年有龍上其事於官中丞以下各旌獎其門他如助山西焦姓江南張姓之棺濟邑人王三祝等之粟又捨藥材設義塾脩學宮建書院捐義倉賑荒歉善行日積書稱壽考康寧而攸好德者殆其人歟年八十二卒邑人傷之子文柱候選州同次子文樸貢生

淮寧縣志卷之十九

人物

十三

季進德字翰如陳地世族以明經任山東福山令委滕縣賑濟進德捐貲以助滕民賴焉遷江西廣信府同知值上饒十三都民變臺憲將發兵勦捕進德以數騎入山諭服之尋擢潞安知府多善政未幾罷歸居鄉勇於爲善恤鰥寡濟老幼鄉人德之早失怙恃每以二親不及祿養涕泗不輟兄一德遠官萊陽歲必往視其天性之篤又如此子綰歷任朔州知州邵武同知緬亦出仕

宋廷瓚字錫召好讀書爲文沉摯有力童試時入庠第一中康熙丁酉科舉人家貧親老閉戶寡交惟以筆耕墨俸養其親無不如志設帳里門以德行爲上文藝次之每講習必考究聖賢心地原原本本引証鑿然受教者請益甚誠反覆指示或竟日徹夜不辭勞也一時成就者如甲子舉人于鏡武鄉試第一白九如皆其及門其他入庠食餼不可枚舉後出宰廣東徐聞縣初莅任卽延名師設義塾以作養人材爲先務徐邑多荒田給民牛種開墾以爲子弟入學之費徐邑俗刁健訟瓚綜理庶務盛暑汗流竟體不休

淮寧縣志卷之十九

人物

十四

左右或勸之瓚曰吾食國家祿恐他人不如我盡心耳甫半載士習民風翕然丕振以積勞傷暑卒于官囊空無餘上官嘉其賢助金二百餘櫬歸徐民泣送者數百人子一鵬哀毀逾禮未數月亦成疾卒陳人聞之者無不流涕曰先生素行如此修德不獲報惜哉

朱作哲字睿公康熙戊午副榜任胙城澠池教諭事親孝兄弟分產惟取其薄推愛姻黨姨母石氏家貧生養死葬三十年如一日在胙城歲飢載粟以周生徒之之澠池設教多所成就士林懷之

趙國用字朝選世居山東鉅野縣明初遷陳州明季
闖賊屠陳國用方八歲扶母而逃廬於墓母疾衣不
解帶者累月及母歿與妻陳氏茹素終身族弟國泰
國安避亂流離收養之並爲成室其他類多陰德國
用夫妻皆壽逾八十易簣時囑其子孫曰吾父母早
逝未得盡養負罪多矣吾死勿得祭豐以重吾罪今
其子孫猶遵遺訓

吳居敬字存一孝友好義父年高主家政每事必稟
于父父命之行唯而退父歿喪葬盡禮三年未嘗飲
酒茹葷其弟行敬早歿遺二子俱幼居敬具棺葬弟

淮寧縣志卷之十九

人物

十五

撫弱孤十五年長各授室康熙四十八年饑佃民積
欠累數十金概不責償貧民杜文學無以自存居敬
收養二十餘年代蓄貲財若干令其治產又代買地
十四畝有黃元少孤憐而育之成立授室給衣食及
元夫婦歿施地廬之乾隆二年選耆老鄉黨舉其行
詔賜清白良民四字絹一疋綿數斤白金三兩給以
八品頂帶邑令程旌曰耆年碩德年九十七卒長子
必遴善承父志偶外出見一少年鵠面鳩形呼籲甚
哀問其名曰李成引至家養數年爲之娶妻李生二
子與地四畝宅一處使別居其他義行類此年七十

餘卒

雷紹宗字嗣美貢生事親孝人無間言年十七入庠奉父命居城中與萬如洛祁庭儀諸人結社讀書母病留心岐黃遂設藥室施劑濟人四方求治者識與不識皆施之歲底持錢償者概不受有強委而去者必託人歸之或以錢濟貧乏積二十四年藥資費五千餘金年七十里人欲製錦稱慶辭焉未幾卒後十年有吏部郎山東馬祺遣僕持書餽人復二斤珠百顆且云十八年前過此患疾將斃賴治而愈今特來相謝不敢忘也子方震姪方曉具書答以未知其由

淮寧縣志卷之十九

人物

十六

歸還原物其生平好行隱德類如此子庠生方震等孫拔貢采章等繩繩相繼並有聲於成均鬢序間雷顯宗字鳳羽明建文時殉難南京前軍都督敬之後曾祖恒辰州府同知祖惟謹父宏俱廩鄉飲宏子二顯宗其仲也補博士弟子員肄業太學大司成孫岳頌器重之考授縣丞不仕性至孝父病癱手足俱廢顯宗長跪榻前以手煖其四肢歷二十七晝夜而愈居恒演說忠孝事以博堂上歡及父病劇焚香籲天請代父歿哀毀骨立母喪廬墓五年家故饒善產多推讓于兄族子麟少孤無依育之成立康熙己丑

陳大饑捐粟濟貧代償逋賦千餘家全活甚衆助婚葬者三百餘家李榮貧不能供母鬻子女以充膳顯宗爲解囊贖歸歲時仍給布米以全其孝又立義塾以教里中子弟季子方曉善承父志張乾名家子夔甚曉委曲提携之汪晰有九喪未葬曉贈以二百金助葬顯宗喜曰此吾家堯夫也他如施藥施地輸粟輸米以周貧病率以爲常奉

旨建坊旌表一時文人學士爲詩歌以紀其事時人稱爲梅隱先生及卒祀忠孝祠子方奮字驚泉候選州同以老親在堂勉兄方運弟方曉力學奮肩家政

淮寧縣志卷之十九

人物

十七

義不辭勞好周族黨每歲暮必以錢物資窮乏年二十八歲卒卒之夕踵門號慟者百餘人子衣德候選鹽運司運同

宋聚五庠生性剛方慷慨有張姓者恃道差橫行鄉里聚五訴劣歛于巡按立除其惡堂兄起儔家業蕩盡出己貲買田四頃宅數楹使居焉同姓宋蘇之父貧甚負蘇來投聚五受之及蘇長給以市宅爲之娶妻里人稱之居恒善臨池學顏歐筆法卒年七十三子之范字蜀公庠生好詩詞工書法嫡母王氏明末病故范於兵燹之際葬之以禮繼嫡母庶母無子奉

事如生母凡遇公事義舉必首倡不惜財物族黨有疾者施藥治之活者甚衆又考訂本草綱目手錄成部施方濟人甚衆范長子邵儒次子游儒皆入太學游儒字定夫承胞叔之韓嗣兄邵儒卒遺姪俱幼游儒撫育成立生母傅氏及繼嫡母呂陳二氏與嫂郭氏歿皆未歸祖塋生父胞兄之柩亦停於堂游儒日夜經營擇期同窆焉母病篤奉侍湯藥晝夜不離及歿喪葬如禮尤善持家凡內外上下以及僕婢各有專職每歲立義塾於家四方來學者多有成就子姪輩亦皆入城均庠序間人以爲善人之後報施不爽

淮寧縣志卷之十九

人物

十八

云

許永祚許長祚兄弟同塾母顏氏病危思食羊肉時值五月徧索不得永祚等各割股合餅以進母食之而愈永祚等於塾中抱疾塾師得其情告之州守李旌之曰孩童愚孝永祚中康熙己卯科武舉

張顯秀康熙己酉武舉初任四川會鹽營守備征苗有功累陞漳州營都司歷官三十餘年勤敏稱職在任時歲饑捐俸賑濟存活甚衆遇修橋修學事皆解囊助之年老歸里八十五歲卒長子純仁中康熙丙子武舉

邢鉞順治丁酉武舉以防禦守夔陵吳逆叛隨營征討斬獲甚衆紀軍功七次以孤軍入其巢被虜脅降不屈賊囚之獄中有小卒餽以食得不死乘間逸出并帶所虜官吏楊又芳等二十三員士卒百餘斬關逃回主帥壯之復命討賊擒叛員歸錄功題陞未受秩而卒

劉發康熙戊子舉人曾祖附名祖瑞色明季俱殉流寇難父早卒母田氏以遺腹守節生發撫之成立發登賢書例得爲縣令以母老辭不就雍正七年州牧舉人才以發應又固辭從弟蘇二歲而孤發撫養維

淮寧縣志卷之十九

人物

十九

謹居平好爲人排難解紛濟貧助弱佃僕以索逋與人爭發卽引咎置酒謝越明年其人刈麥後如數償宿逋發不受爲糴穀入社倉其好義如此卒年五十五

孟鴻儒字魯逸周歲而孤母劉礪節苦守撫教備至稍長卽善體母意自立於學爲文落落有奇氣年十六補州庠方授室而母又卒哀毀骨立數奇屢困棘闈援例貢上雍以縣左需次居恒鬱鬱以不獲顯親爲憾延名師教子勤課讀輕財重義邑中有大災青大興作輒出粟捐金有不給者尺布斗粟無不贍也

歲壬子年六十五次子調任山東鄒平知縣時自山左歸省居數月寢疾而卒

焦興國字格天庠生娛親務極色笑性慷慨己丑歲歉族黨以饑寒告量力所能傾囊濟之後以齒德兼優給八品頂帶年八十三卒

靳士英庠生字青子性醇謹好施予姪曰曾家貧英教養備至撫育若己出康熙四十八年荒有商人失財饑餓將斃以粟十石予之黃嘉欠債百餘金憐其貧不責償鄰里當地不能贖回者焚券歸其地施義塚數畝以庠遺骸里人德之

淮寧縣志卷之十九

人物

二十

徐鐸字覺斯候選州同性孝友父臥病鐸奉侍湯藥衣不解帶者三年歲饑鐸爲社正公愼有條理又捐銀穀設廠放賑存活甚多有張氏鬻女三載持原價請贖鐸不受厚贈遣之年七十二卒

楊棟字含粹竭力孝養父母歿後居墓前日負土築塚嘗曰父母遭兵火鞠育吾身勞瘁極矣吾身猶在父母何存輒嗚咽失聲路人感動生平重然諾修橋梁年九十旌八品頂帶又三年而卒

竇興傑字蘭秀太學生善治家政初產止千畝積至十倍及分爨無寸帛一錢之私未三載兄弟繼歿諸

姪在襁褓興傑復以數年所蓄二千餘金入公值山左大饑流離塞道開倉施賑活數千人本州荒施粟煮粥活者數萬親族貧不能婚葬咸爲資助施棺捨藥不可數計貸者概不受券縣令顧題其門曰天道祐之

高九成字魁明年十二生母歿哀毀骨立事父暨嫡母恭謹歿後廬墓側負土起墳遇母難辰終日不食族子洪仁幼失母撫養至二十歲復助百金聽其自立歲大稔鄰里告貸出二百餘金糧五十餘石明年具酒食告曰里黨理應周卹顧力薄不能遠及豈望

淮寧縣志卷之十九

人物

二十一

償哉悉取券焚之又修搬醫口橋梁建城隍廟捐義倉壽九十而終

雷方聲字宇聞性至孝父早卒母好施與欲獨建一橋約費百金時聲囊空乃稱貸以成母志里有負德者旁觀欲起而攻之聲止曰勿使渠有不義名州牧聞其賢立爲鄉正事無大小俱和以處之人咸感德焉子雷霈皆入庠

王之法字顯初六世同居共食百餘口各執所業門庭藹然舉鄉飲耆賔卒年九十六子澤濟亦有孝行父之法以足疾樓居不能登降澤濟年五十伴父二

十年於樓不入私寢父歿與兄弟同居二十年壽亦九十

王宗禹字德先生而穎悟初學爲文輒下筆驚其前輩與孫常徐伯子師事貢生陳恪互相切摩年十八受知學使拔取冠軍食餼於州十試不售以歲貢授內鄉訓導招諸生講學論文無虛日內鄉百餘年無甲科諸生楊維翰楊建勳請業惟謹宗禹丁內艱歸二生負笈以從維翰於甲子登賢書建勳亦拔貢成均內鄉文風由是不振尋補洛陽訓導再署偃師亦諄諄以學行爲諸生勗末一載卒於官

淮寧縣志卷之十九

人物

二十二

祁庭儀字子鳴卓犖有才識嗜古好學落筆千言立就未弱冠食餼試輒前列晚年以明經薦自是絕意進取退居鄉村闢園亭顏曰覓閑蓋取放翁老來欲覓數間閑之意也雍正丁未授廣文以年老告歸生平事親以孝制行高潔與人交不留然諾求濟者無論識與不識皆立應或因其朴厚詐給財物庭儀知之亦不與絕以年高德邵舉鄉飲大賔多著作歿後子孫哀其集得覓閑亭遺詩東遊草付之梓又有蟻丸集藏於家

王加聘字莘野幼好學爲文豪放有逸氣童子試以

冠軍入庠與萬如洛祁庭儀並稱文行兼優之士性
伉直爲人所敬憚嘗讀書城中有生員李姓者爲優
人所辱加聘率諸生鳴於官優人之主以利貨李姓
李與之和加聘怒持僧帽付之大聲疾呼曰若輩有
玷青衿學校中豈容有此哉自是士人砥廉隅重名
節惟恐加聘知其過一時遂有王彥方之稱晚年絕
意棘闈設鐸鄉里後學多所成就尤好易晝夜不輟
乾坤復姤等卦獨有見解乾隆十八年舉耆老准給
八品頂帶年九十八無疾卒著有周易註疏四書講
義藏於家

淮寧縣志卷之十九

人物

二十三

胡會圖字輯五父事明爲諸生明季殉難會圖方髫
齡奔走慟哭不欲生旣乃念家陷賊中子身獨存不
可死乃避匿他所流離轉徙時猶默識素所習經書
曰吾親所授也亂定還里四壁蕭然益刻苦誦習寒
暑靡間補博士弟子員以學行見重於時歲己酉州
牧孫知其賢聘爲義學師秉教數年多所成就性仁
厚無疾言遽色與人交恭而有禮鄉人咸敬之內行
醇飭門以內雍如也州牧張舉鄉飲旌其門壽八十
有四無疾而卒

鄭有則字淑度性恬靜喜讀書經史淹貫爲文典雅

精純無寒儉態年二十八補邑庠領雍正乙卯鄉薦
中乾隆丁巳進士榜後以父母喪回籍壬戌赴都補
試授翰林院庶吉士讀書中秘思以著作表見未竟
其志年三十九卒於京師
王方邑庠生萬如洛之門人居家孝友品行端方文
學充贍儒學舉爲優生社學推爲社長鄉里咸稱得
人居鄉設教其及門多成材採芹鄉薦指不勝屈士
林至今稱之

雷方運字驚田恩貢生候選教諭孝義雷顯宗長子
也穎悟好學經史古文外各家之書無不涉覽讀書

淮寧縣志卷之十九

人物

二十四

務求心得尋繹時至廢寢食課子弟誦讀親自選註
手錄乾隆丙辰舉賢良方正有司欲以方運與弟方
曉應運與曉固辭勿獲卒舉方運逾年卒著有春秋
心解四卷古文心解六卷藏於家子繼祖廩貢生候
選州同通詩文次錦繡太學生

高有恒字聖思附監生少孤築室墓旁春秋祭奠嗚
咽不已母王氏晚年病常依膝下和顏談往事以悅
母志母聽之輒進飲食母歿後勺水不入口者三日
每一慟嘔血數升光州王起鳳携子居陳不得歸鬻
子於有恒有恒知之焚券還其子代償鳳逋併給歸

費故吏目張罷職徒涿州眷屬羈陳七年有恒竭力
周恤寢疾猶命子崑勤給口食嘗公舉約正有構訟
者得有恒一言卽不鳴官鄉里以其孝義咸推重之
勞有成邑廩生姪宏仁幼喪父母寄姓沈邱王氏有
成至沈邱言於王王亦有子與歸撫養成立并給田
宅居隣聶魁綱子婦方妊而子死婦改適於張約遺
腹生男歸聶未幾魁綱疾篤田宅付有成囑以遺子
歸宗事言畢而歿有成出己財殯之聶果生男有成
言於張張弗許鳴之官得歸名曰品以撫之既長田
宅付之子四人皆有名庠序諸孫入庠食餼者七人

淮寧縣志卷之十九

人物

二十五

咸謂好義之報云

宋輔縣民貧而廉與妻郭氏紡績爲業輔晨出耕作
有汲縣柴姓母子變產逃荒囊儲銀十六金錢千餘
遺道傍輔拾之囑其妻曰富貴在天彼來覓金當還
之已而柴母子號哭至郭氏遣人告輔還驗悉與焉
輔夫婦勤儉耕織之餘課子誦讀後子卿雲補邑庠
輔年七十五

張以占居東堤口有睢州客劉玉挾貲投斗行趙魁
遺銀三十五金爲占所獲劉玉覓金與魁爭詎適以
占至出銀歸之乃解

趙長垣字廣輿由庠生入太學生事親孝父歿與母合葬啟壙時長垣觸棺幾絕復甦每逢父母忌辰流涕竟日主家政三十餘年毫無私蓄析產之日兄弟以美產互相推讓康熙三十二年助給陝西流民七百餘人貲糧歸費議叙知縣註冊四十八年歲饑長垣出粟賑濟稱貸者不責償又捐貲設義塾施藥餌鄉里稱盛德焉長子廷瑞候選州同性恬靜仲子廷瑄由庠生援例國學父母葬廬墓三年借貸者亦焚其券季子廷瑤亦好義堂兄廷琦疾革託以遺孤瑤爲之撫養成立趙氏一門孝友樂善足徵世德云

淮寧縣志卷之十九

人物

二十六

高驪字季偉貢生性孝友事親能先意承志父官廣東臨高令病篤焚香祝天祈以身代及卒哀毀骨立不飲食者三日事母承歡備至母歿後逢難辰輒不食天性純篤如此又好施與同里閩進思孟林貧不能娶各助三十金完其室家商人秦子廉張星燦借貸百金力不能償焚其券遇歲稔必周其親族之乏食者學宮傾圮捐貲修整邑人稱焉子文相候選州同克守世德

李作臣字振九性孝友父母相繼歿哀慟幾絕兩弟俱幼一弟尚資乳哺作臣懷之向鄰里乞乳適妻郭

氏生子作臣喜曰吾弟不患無乳遂與己子並乳始得成立復爲之完室家立生計怡怡友愛終始無間族黨盛稱之子世俊登丙辰武闈孫彭入郡庠咸謂孝友之報云

雷方震字驚伯孝友性成父遊江南病還震嘗糞以試甘苦繼母宋氏性嚴厲事之能得歡心父歿有弟六惟次弟方起成立餘俱幼穉震經營產業立出入二簿條理秩然以是延師課諸弟皆成名分產時良產任弟擇取後諸弟中有蕩廢家業者猶割己田與之子建章太學生次采章拔貢生

淮寧縣志卷之十九

人物

二十七

蘇鉅貢生好讀書事親孝母有疾藥餌需流水奏效鉅日赴沙河汲流水往返百里辰出申歸不以爲瘁母疾遂痊父命析產不問美惡多寡家庭無間言教育長兄之孫三人修脯膏火悉自己出十餘年如一日旋以勞致疾易簣時泣囑其子澧曾善事祖父母庶藉此以瞑目言訖而終

劉英字千士幼孤事母孝伯兄早卒延名師訓兄子發讀書督勵甚切發中戊子科經魁英之力也與人交不留然諾求濟者無不立應或有因其好義計給財物者亦不介意居處有汾河一道長五十里河水

暴發被患者千餘家英築堤備患悉成沃壤雍正元年以貢生授唐縣訓導未履任而卒

劉燦字質菴歲貢生年十三而孤事母曲體親心遇母疾親奉湯藥必嘗而後進隆冬嚴寒不入寢室母卒哀毀盡禮伯兄早逝悉以膏腴與姪並讓產於仲季有推梨讓棗之風族黨婚葬不給者罄囊與之無德色晚而好學取古今格言條列座右卒年六十一勞宏業幼聰穎年十四入庠父故家貧業負土成墳遇風雨卽涕泗嗚咽母疾奉湯藥晝夜侍榻前密聽聲息母年將期頤業年已七十尙依依膝下以娛其

淮寧縣志卷之十九

人物

二十八

母母歿號泣幾絕更友愛諸弟延師督課並列膠庠怡怡一堂蓋天性然也年七十六卒

程法孔事母誠孝母故獨居柩旁三年每有事出入必告之柩前不失出告反面之禮康熙辛卯州同吳元錦旌曰孝行可尙年八十七卒

李學習幼齡卽知事親之禮稍長遇親疾衣不解帶歷四十晝夜親歿泣血三年未嘗見齒所遺產業讓弟學倫鄰民趙太馬秀家貧未娶習爲捐金娶妻兩姓子孫繁盛順治壬辰陳州大疫學習見無棺者悉葬之知州高匾曰慈德補天康熙十四年代納鄰人

張璠韓永成等逋賦知州錢旌曰尙義可嘉
張中奇附監生性孝友母金氏病危中奇祈天願減
己算以益母壽病竟痊從叔化行極貧中奇周之卒
又葬之族姪民秀老而鰥中奇收養以終天年至如
焚王子貴券施徐可金等地畝設家塾助寺田善行
不怠年七十三卒

陳爾澤農民也父早故事母孝母偶不悅則長跪請
罪務得其歡心母歿哀毀踰禮經營棺殮毫不假諸
弟力嫡姪維翰貧且無子月給糧薪如是者三十年
本方有廟傾圮捐貲重修凡有稱貸皆不責償孝德

淮寧縣志卷之十九

人物

二十九

善行里人稱之

雷瓚明辰州同知雷恒曾孫庠生振祚子也年十三
父病脾泄醫欲知糞甘苦以投藥瓚嘗之以告醫晝
夜籲天不止父病頓愈及長父命分居瓚以美屋腴
產讓兄怡怡無間姊適党氏寡居無子瓚爲立嗣并
供布粟以全其搯歲饑出己貲以周貧乏父友張岑
貧甚挈家投瓚瓚爲籌其居處服食十餘年無德色
子方來字九臯康熙丁酉武舉工書畫善騎射父瓚
好客小飲或至終夜來與弟方性侍父旁不敢先寢
母命僕代之來曰兒樂此不倦也父母歿以華居讓

弟自闢涉園於沙湄與其舅張漁渭課讀漁渭有學
行安貧好學甥舅相尚以道遊其園者日爲煙霞中
人

徐之馨五歲而孤事母魯氏盡孝母與言父存日事
卽涕泗橫流母歿哀毀盡禮嘗以魯氏家規訓其子
伯牙事亡如存舅氏貧老無依奉養十餘年以迨舅
歿偶遇歲歉卽以蓋藏濟其宗族鄉黨焉

徐之珍幼失怙與兄之龍事母以孝聞兄歿遺姪伯
長珍撫育之康熙四十五年族孫廷超官陝西珍依
之超卒家無餘貲珍出己財二百金與超子邦孚扶

淮寧縣志卷之十九

人物

三十

櫬以歸秦人重其義旋里後率合族建碑祖塋見鄰
里婚葬不給者常周之

徐廷珈好義族兄武舉徐廷超官礮伯卒於任旅櫬
不歸廷珈倡捐歸櫬族人徐之杭被火一門十餘人
裸身匿於厠廷招商之於祖給衣收養於家鄰人死
無棺者殯之僕役服勤久者遣之年五十九卒

王國祥庠生聰穎過人父患癱症祥廢書不讀晝夜
坐臥榻前扶持左右每於飯後必引述古說以娛父
或負其父出庭幃外承歡色笑如是者十餘年父歿
母亦歿喪葬如禮諸弟議分爨國祥以產業付仲季

二弟曰余大事已畢硯田可耕留此爲諸姪謀生計
余當督課焉乃立家塾訓其子姪四方來學者日衆
及門貧乏不取脩脯并給供饌以成就之年五十四
卒

李帝培候選州同居家孝友母早背逢母難辰不食
父患痼疾帝培侍左右不離親友婚葬事偶一至焉
道雖遠晚必歸省父卒廬墓三年諸弟皆幼冲爲之
具衣食成室家兄弟怡怡老而彌篤七十四卒

高啟祥年十九入庠以歲貢授滑縣訓導孜孜課士
貧乏者助以膏火士人德之尋以養親告歸孝養備
至從姪三人產盡啟祥各給地一頃賦稅仍代爲完
納親族告貸者力不能償概置勿問暮年遭親喪哀
毀過禮勺水不入口者累日以此致疾卒

胡一德增廣生好讀書事親克供子職父年九十一
德侍杖履弗懈母病床褥七年奉湯藥維謹兄弟同
爨五十餘年內外無間言嘗修堤以禦河患一方賴
之晚年退居城西庄開家塾日翕受齋士之資斧不
給者佐以膏火焉

高可大自幼失怙恪遵母訓勵志讀書以庠生貢入
太學篤友于之誼延師督課其弟必先食餼於庠山

嚴丁酉登賢書諸弟後先成名皆可大教育之力年四十七卒

徐伯子庠生性孝友父病衣不解帶居喪盡禮析居時讓產於弟教族姓以詩書康熙己亥歲伯子散雜糧四十餘石以濟鄰里賴以存活又能敦宗睦族更正徐福祭田重修家乘里人稱焉年七十三卒
錢鵬冲庠生紫雲嗣子事本生父母與所繼父母並能善體親心兄弟怡怡無間言族兄鵬程族姪乘仁病故無棺鵬冲悉斂葬之族弟鵬翮負逋出逃鵬冲代償所逋復與地十畝以糊其口又助鄰人吳進劉

淮寧縣志卷之十九

人物

三十二

福婚娶之貲脩廟寺橋梁傾圯之處邑令何登棟給匾族獎撫憲雅以銀牌旌之

吳竟成字復可貢生授永城訓導性耿介却貧生禮不受訓迪多士有方捐貲修學宮薦擢江南太和縣知縣未赴任而卒

辛永和字柳聖幼穎異十歲能文長好讀書至忘寢食年十八入庠旋食餼中順治丁酉科舉人以訓授生徒爲業其設教也敦士品尚實學門人吳方胡會圖吳庸敬李若楠等皆以文學孝義著上林則之授山東鄒平令聽訟明決棍徒斂迹革除重耗吏後不

能爲奸邑紳王姓宦他省虧帑二千餘金永和代償以釋其罪至於勸課農桑振興學校善政在人耳目鄒人尸祝之尋以疾歸里居鄉有聲兩舉鄉飲大賔年八十四卒

焦維棟字相如工書法事親能先意承志父歿閉門讀禮不接賓客三載性好義有壑戶謝安李虎者積欠累百餘金不責償又有張姓貸四十金貧甚焚其券每有暴骸棟施棺木以瘞卒年七十七長子嵩次子疑俱入庠

張邦棟監生母故事繼母潘氏盡孝家無間言異母

淮寧縣志卷之十九

人物

三十三

兄弟同居弟亡撫其孤如己子輿論美焉

邢履端邑庠生康熙四十八年歲饑履端積豆糧七百餘石開倉借食概不責償五十三年兄履素履正各爭地互控履端苦勸不從即分己地讓履正以息訟頗有古風

馮修倫字天爵性孝友侍親疾衣不解帶者彌月親歿哀毀骨立遇忌辰輒嗚咽流涕與弟同居至老無間言析居時獨取瘠者或勸爲子孫計倫慨然曰手足至重田產身外物也吾子詎不能承吾志耶衆皆服子炎邑庠生

苑有仁太學生父歿弟愷僅七歲仁延師教訓分居後又出己財爲愷援例成均祖父遺留僕人聽其歸籍僕女待年令其父母擇配親族中窮乏者務周濟之子國維入庠

苑有愷太學生生七歲而孤母病奉湯藥不怠姪孫幼無依愷撫育若己出遇有貧不能葬者助以己財人頗重之

王思孟字淑輿庠生性好義族人王簡王五幼孤孟給以衣食各爲授室陶姓思孟外家也貧甚周急不
缺及孟外祖母母舅歿皆營喪葬胞姊適韓國才家

淮寧縣志卷之十九

人物

三十四

徒四壁買地八十畝予之鄰人黃體中有虛差二十畝楊名輝虛差二十七畝不能納糧孟代完納至於施程姓棺修濬河工尤其彰彰者卒年六十龔自行舉人龔黃祖也家不甚裕而好施予見人衣食不足婚葬不給者傾囊相資又好買虫鳥放生窘乏時亦必爲之連年大饑古廬居民三百餘戶欠國課千餘金拘獄追比自行憐之廣爲募化益以己資逐戶上納州牧蕭感動亦捐五十金累年積欠全完蕭牧旌之曰急公救難

李成貴庠生輕財好施親鄰告乏無不慰其意以去

修道路橋梁施義地一畝義塚二畝義陵北垣外地六畝善行殊多里人稱之

朱紳出粟三百石賑荒窮乏者有求必應焚券不取濟人甚衆

朱承宣字召南樂善好施焚借券五百金復捐金濟荒邑令旌之

許昇候選州同里中自搬晉口至賀家溝爲南北通衢當水冲多淖行者病之昇捐金培如長堤計丈七尺有奇不數載仍爲水決昇復修之工垂竣水驟漲又壞昇曰爲善不終與不爲等復鳩工築土較前更

淮寧縣志卷之十九

人物

三十五

固先後所費蓋千金有奇云

王宏義太學生宏舒邑庠生好周急鄉里公舉宏舒爲約正排難解紛人多息訟宏義嘗捐修洪濟橋助躋壽院米焚佃人宿券州牧表其門曰化行俗美徐之碧州人明季兵火後遺骸暴露之碧與郭尙默孟守柏鄧清王邦彥劉之漢陳廩等四路收殮族叔流亡不能歸備車迎歸爲置田產每歲饑卽濟貸親族州牧趙旌獎之

程述孔性好善康熙己丑賈魯河決溺死者甚衆振興集房舍盡壞述孔與妻李氏駕小舟渡活八十餘

人是年十二月鄰人郭姓范姓因貧鬻妻述孔悉贖歸之卒年八十二

任志誠太學生多善行歲歉濟人以食復捐貲修大渡橋汾河漕河水漲阻行旅志誠備舟渡人鄉里呼爲任氏義渡歲歉助賑署邑事許佩璜旌曰惠周鄰里年四十九卒

張希良庠生殉難紳士張嘉遇孫好施與助范學凌福之棺殯董振張炎董義之父代張姓贖女年九十而終

林竹太學生姓好善年饑出粟賑貸遇有鬻子女者

淮寧縣志卷之十九

人物

三十六

必厚贈之州牧左公旌曰珠輝玉潤

李兌吉武庠生天性仁厚生平無延質事其鄰人孫姓喪父不能葬兌吉施棺葬之張姓喪妻子女無依吉憫焉爲之續娶又爲姻親李姓贖產以寧其室家僕女待年令其父擇配不受贖價佃人王姓子患痘不治送之野兌吉令抱歸延醫治之而活種種好善大率類此

王君美農民也性至孝母病危欲食肉君美祈禱於神密割左股作餽餽以進母食之遂愈其年君美收麥先已量有定數及收時獨多八石不知其所自來

咸以爲孝動神明之佑云

孟調字覲之淮陽舊族性孝友所學以天人性命爲根柢而期於躬行實踐年十六遊庠雍正七年由廩生拔貢適奉 詔舉學行有爲之士總督田薦於朝簡發山東以知縣以下試用歷署招遠鄒平安邱等縣所至政有聲遇寒士力學者尤多所振拔時雍正十年也調以父母在籍門閭相望屢欲陳情乞養大憲嘉其才弗許嗣聞兄弟相繼歿卽日告歸所以慰父母之心者委曲周至凡奉匱沃盥皆親任之父母疾籲天求代及歿喪葬如禮廬於墓者三年長兄

淮寧縣志卷之十九

人物

三十七

無子以己子嗣之撫孤姪如所生家設塾來學者多所造就嘗言聖賢精蘊先儒闡發殆盡迺取前哲微言奧旨與其用功之節目輯爲篤志編與子姪親爲講貫未十年姪國彥國禧克領鄉薦皆調教也調急公尙義每歲糧銀首先完納乾隆五年監修絃歌書院數月落成七年勦辦淮邑賑務悉心經理十九年恩 赦錢糧調推廣 皇仁免佃人租及歷年積欠有阮鄭氏者貞女也爲之請旌徐廷友者故人子也爲之娶婦其他敦族睦婣殆難更僕數乾隆二十六年邑紳呈請入祀鄉賢可以知其實行矣

以下新增

張體銓字子衡乾隆丙辰進士幼力學家貧嚴冬以草裹足後授山西稷山縣知縣適鄰邑萬泉有土寇上欲加以重典體銓力爲昭雪所活無算解組時百姓遮道哭聲振野有送至百里外者

方鳴球邃園張公家傳公諱體銓字子衡邃園其號也生有至性事父魁英公暨母王氏孺人曲盡色養以菽水承膝下歡迨事繼母劉孺人亦不虧孝德劉孺人遂愛之如己出焉公天姿英敏千言立記於子史百家無所不窺作文沉厚雄偉堪與天崇諸大家並席而理解尤能不詭於正立志拔

淮寧縣志卷之十九

人物

三十八

俗不治家人產業嘗與同懷兄講論經術指畫千古得失因慨然曰吾輩生當太平徒沾沾於文字中挾華摛藻不能爲天地立心生民立命直與未讀書等年十九補博士弟子員旋以歲試冠軍食餼越十年登雍正丙午賢書益復枕肱鴻秘獻酬古烈又十年成進士爲丙辰河南省元歸而講學不倦郡守金公重其品延爲絃歌書院山長實心誨迪多士之沐化雨坐春風者未能更僕數泊乎筮仕山西稷山縣縣乃直隸絳州屬甫下車改弊除苛寓嚴於寬胥吏如立冰上青疇綠野隨處歌

慈母焉會蒲州府萬泉縣歲饑民食穀情迫其不獲者在府憲前如有洶洶狀府憲猝以民叛通報柄政者據報奏聞 天威赫然賜果毅訥公上方劍勒兵以行欲盡法誅之訥公抵萬泉設壇而坐排左右露白刃蒲守與萬泉令已就縛先加激民叛者以罪而叛民可立誅也萬泉與稷爲接壤邑公悉萬泉民無叛意因躬歛訥公願以身保訥公弗聽公爭之益力自朝至日中往復辨論侃侃不屈訥公怒按劍目公曰汝崛起獨不畏是耶衆皆魚愕雞睨舌撝而不能下公正色曰 天子以

淮寧縣志卷之十九

人物

三十九

劍賜公戮有罪耳今某爲百姓請命法雖峻肯及無罪吏乎訥公感公誠懇意稍釋遂以公署萬泉事限五日清賦試公才並試萬泉民也公推誠撫字平其瘡痍未五日欠賦一清訥公聞之色然喜曰信哉萬泉民果非叛也微張令幾乎誤誅一邑維時民皆焚香泣下呼公爲萬家生佛訥公歸朝言公可大用不次超擢在指顧間公虞不久爲大吏所容以病告歸惟有一葉空囊以清白遺子孫而已卒年六十有二公敦行孝友重然諾尙氣節家貧耕硯田自養修脯之餘並以瞻親族困乏其

生平好義根於至性類如此余叨附蘭譜自忘不
文爰率筆而爲之傳

論曰寒儒讀書半生諒能以所學自負一旦掇青
衣紫躬膺民社尠有不負所學者公一介作宰稷
山獨能俾鄰封萬千赤子旣不死於歲又不死於
兵此中作用知從眞讀書煅鍊而出公嘗言爲天
地立心爲生民立命跡其活萬泉邑衆一事已不
負此兩言矣人或以用不盡其學爲公惜雖然公
之學亦何可沒哉

雷方曉字驚萬號抱癡已旌孝子顯宗季子也豪俠

淮寧縣志卷之十九

人物

四十

好義有雲林之癖所交如彭湘南錢廷文張體銓皆
知名士著有雪廬詩鈔乾隆十九年修邑乘總其事
焉

陳標字允式號和菴中乾隆甲子科第一名武舉甲
戌科進士引 見以侍衛用賞戴藍翎乾隆二十五
年選廣州都司旋由吳川遊擊升崖州叅將值黎峒
滋事檄委進剿足被傷力疾追擊未半載奏捷擢香
山副將大憲以龍門要口近接安南奏請將標調任
奉 旨准行歲飢軍民乏食標以工代賑大憲嘉其
能交章保薦 恩簡浙江定海總兵兼署提督嗣台

灣逆匪作亂標領舟師梭巡海島台匪不得蔓延士
民德之入都 陞見疊奉 溫旨因足疾屢請假任
不准乾隆五十七年始得告歸尋卒嘉慶二十四年
經部咨查列入 國史嗚呼榮矣

季綰字丹錫號鳳章潞安府知府進德長子乾隆丁
巳由明經援例授山西朔州有政聲朔地處晉北當
春風狂沙簸夏則雨雹爲田廬害綰素敬關帝因繪
像朝夕展禮爲民祈福邑不告災者七年旋以疾歸
至甲子補授原缺歲大旱禱于帝君甘雨時應歸化
城有犯擬流綰憫其情力爲昭雪後升福建邵武府

淮寧縣志卷之十九

人物

四十一

同知俗好械鬪且健訟力挽頽風士民稱頌以母老
陳情終養家居十餘年多所義舉母歿哀毀過情不
數年而歿弟緇以通判揀發雲南補廣西府通判運
銅赴京往返萬餘里大吏嘉其能署開化府因被議
旋里壽至七十有八

高文柱字運乾號清川淮寧世族生有異質乾隆十
九年修邑乘慨然以徵文考獻爲己任與兄文相始
終其事三十九年督修黌宮自後放懷詩歌題其軒
曰市隱偶與故老暢談今古精悍之色見於眉睫所
爲詩多散軼士林惜之子葆光庠生

雷繼祖字聿齋由廩貢捐州同已旌孝子顯宗長孫
賢良方正方運長子也性孝友工詩文好施與尤精
岐黃嘗著醫論行于世

吳履坦字平叔號適園歲貢生任魯山訓導弱冠知
名善書其試卷蒙學政批真草可作二帖又有一部
黃庭經誰人肯舍之譽著有適園集行於世

錢廷文字樸安號柳圃學極博詩古文詞爲一時冠
冕其乙卯日錄事無不可對人言祖母疾妻萬氏刲
股以進刑于之化也著有柳圃詩集行于世

趙體華字炳蔚監生國用孫也輕財尚義其友馬華

淮寧縣志卷之十九

人物

四十二

龍由武進士銓選雲南傾囊相助睢州蔣侍郎曰綸
家貧時體華延訓里中子弟常以金贍其家俾無內
顧憂及曰綸赴禮部試更厚贈之登第後猶時周其
乏生平成人之美大率如此年至八十三五世同堂
子世昌附貢生亦克承家訓年至八十四

雷采章字東閣號閻亭幼失怙毀瘠有至性乾隆辛
酉舉拔萃科朝考人都望雲之思未嘗少釋聞父疾
卽馳歸左右就養十數年無倦色事繼母謹有蔡徵
之遺風又深知稼穡之艱難當盛夏沐雨櫛風偕佃
人耕作或勸仕進則以親老爲辭親歿喪葬如禮家

設木主率子弟展拜日三每念生我劬勞罔極未報
泫然出涕聞者興哀事兄敬有過未嘗不諫卽逢彼
怒怡怡如也姪破產嚴誡之代復其業諸父諸舅告
匱周其饑寒並有生養死葬者乾隆十九年修邑志
三十九年修黌宮皆力任其役四十七年龍灣口決
邑告災郡守按口給賑嗣有聞賑歸來者采章以錢
粟施之五十一年歲大饑戚黨中多所告貸或貧不
能償卽焚其券有以塋田鬻者必留隙地聽鬻主自
葬訓誨子弟以敦行爲本案頭壁上所置皆醒世格
言受業中得第者指不勝屈又於別舍設義塾來學

淮寧縣志卷之十九

人物

四十三

者亦多所造就他如修橋路救疾苦習以爲常鄭廣
文旌其門曰當世醇儒記實也生子四長孟伸次仲
伸次叔伸太學生次季伸歲貢生候選訓導孫淳孟
伸出中乾隆甲寅舉人歷任遂平信陽新鄭訓導孫
兼山季伸出道光五年拔貢詩曰貽厥孫謀以燕翼
子采章其庶幾乎

白賜功字掄升太學生以子永亮貴贈文林郎世居
關中朝邑縣祖岐鳳避兵於陳遂家焉少敦行學政
孫按臨陳郡問邑中有步趨先民能以實學訓子弟
者邑令以賜功對乾隆七年協辦淮邑賑務巡撫旌

其門曰好施不倦修府縣志力任勦刻生子五長永亮字維寅號愛廬由附生中式乾隆己卯科舉人壬辰科揀選一等分發湖南歷署城步藍山臨汝等縣興學校勸農桑絕苞苴所至政有聲後題補麻陽充庚子同考官明年歲饑申於上發帑賑之並請湘潭米協濟其室于孺人並典簪珥助之以故活者無算後以疾告歸諸弟有不能自立者悉分產俾充衣食其他尤多陰德士林重之孫煥發字炳文號樂田候選州同卽永亮之長子也少隨任旋奉父母命摒擋家務或往來陳楚間遂至廢學性孝愛弟亦篤女兄

淮寧縣志卷之十九

人物

四十四

適葉者撫其孤爲營田產舅氏無依敬奉之歷三十年如一日諸父貧乏爲償夙逋贖田園戚黨婚喪不舉周濟之鄰里口角排解之邑有公事如建文昌宮絃歌臺皆捐貲襄事嘉慶十八年歲荒給佃人粟活數百人又以邑令邵元璋籌餉防匪并煮粥以惠窮黎煥發慨捐千金布政司諸知府李褒以匾額又奉巡撫方奏請獎勵奉旨加一等賞給頂戴易曰積善之家必有餘慶今其長子衡統次子錦堂俱以秩顯三子玉堂嘉慶癸酉舉武孝廉又皆善承父志嘉慶二十五年黃河水溢漫入渦河民堤冲决衡統等

出資捐修邑令劉廣澍給匾額以嘉之道光三年錕堂於北關橋下修路十里以利行人玉堂修古糧城以綿古蹟其女適太康許氏守節逾三十年可以知其家教矣

雷錦繡字華齋候選州同繼祖弟也詩有奇氣兄歿代理家政數十年如一日事嫂以敬撫姪以恩乾隆五十一年歲荒蠲佃人租並日給口糧施藥餌以拯窮困迄今子孫克綿世德人稱積善云

李郡字惠周候選直隸州州判世爲西華舊族後遷於淮性豪舉乾隆十九年修邑乘郡捐金勸事歷數

淮寧縣志卷之十九

人物

四十五

年不倦二十二年黃河水溢邑告災賈魯河兩岸被害尤劇郡築堤以衛村民心力交瘁卒年三十有二鄉里惜之子二長樹仁字敬止次樹義字宜菴幼失怙事母以孝聞母歿水漿不入口者累日家素封凡邑義舉如修鬻宮建文昌宮皆力任其役族黨中饑者食之寒者衣之喪葬不舉者給其求負債不償者焚其券歲荒煮粥助賑多所全活其有因荒鬻子女者售如其值歲熟或歸其父母或完其婚嫁村西不戒於火延燒數十家按戶分給箔草又嘗捐設義地收葬枯骸其他陰德未易悉數樹仁援例捐知府銜

子二長標次楷樹義捐布政司經歷子二長樽次楓樽字節之號亦僊幼嗜學既長從事藝圃著有方壺詩草四集援例捐通政司經歷奉部催選以親老辭年二十七歲卒道光五年續修邑乘標與楷及楓各捐金助工承先志也

智思明字若愚弟思誠字奉天篤於孝友伯兄思臻歿子姓繁衍有議析爨者卒弗聽又好行陰德見義必爲乾隆丙辰兄弟相繼歿思明壽八十有三思誠七十有九同居七世門內肅然思明子夢雲字華毓早歲遊庠是時父老家政悉委之父歿哀毀備至家

淮寧縣志卷之十九

人物

四十六

食指素繁摒擋不易不得已析居每念祖父創業艱難飲食服御一以崇儉爲本弟早亡撫姪如所生故人子徐體元失怙恐其流蕩嚴誡之體元歿爲恤其諸孤族黨待以舉火者不少吝自言平生所佩惟孟子三自反仲由喜聞過及動心忍性數章壁間懸范魯公誠姪詩馬伏波訓子書俾子弟觸目自警孝廉郭鶴齡贈詩有家規繩後輩身範繼先民之句可以知其實行矣子四人湛洽廩貢生涇監生阜庠生皆能世其學義方之教也

吳蒼曉字雲霞庠生讀書窮理家設塾舉人李啟明

貢生李士錦皆所造就所著詩文採入邑乘子萬霖廩生性孝友博學好古成就生徒甚衆陳郡之士半出其門年五十四卒門人爲營葬焉

雷衣德字乾元幼失怙事母以孝聞家素豐族黨恒多稱貸值母七旬思爲親壽檢貸者券悉焚之累援例捐運同以故父方奮母氏張咸得封贈嘗傍沙河建偏園臺榭足供憑眺一時名士皆從之遊至今題咏猶有存者

金允宜字審一歲貢生幼力學工詩藝所爲詩七律尤高古一時名士皆從之遊著有詩集藏於家

淮寧縣志卷之十九

人物

四十七

竇忠字誠菴淮寧舊族幼失怙事母以孝聞嘗肄業至周禮睦嫻任卹奮然自任與人交和平樂易乾隆丙午歲飢活人甚衆生子二長長齡次長吉有父風遇邑義舉如建魁星樓修文昌宮置察院號板皆捐貲勸事嘉慶二十四年秋黃河水溢邑告灾長齡之子存初奉母命駕舟施餅凡避溺有襁負至者悉收養之邑令劉廣澍旌其門曰惠媿敬忠

苑挺字子勁歲貢生性恬退以獎勸後學爲務家析產取瘠田數十畝餘則悉讓于兄乾隆二十年歲荒竭力周急年七十餘好學不倦今沙水南北猶津津

道之子重華字雲松號瑤圃通時藝詩賦尤工筆墨
外風流自賞年十九應童子試受知于孫學政食餼
後中乾隆辛卯舉人選許州學正設帳授徒以清真
雅正爲宗有嗜學者心好之不啻若自其口出乾隆
五十一年奉檄捕蝗墮水中寒以疾歸里旋歿詩賦
遺稿未得付梓士人惜之

孫酉字二山常弟康熙庚子舉人歷任直隸新城定
興赤城等縣所至有惠政上憲嘉其能以疾告歸年
至八十餘卒子彥穎由貢生任湖北均州知州以清
慎稱有父風

淮寧縣志卷之十九

人物

四十八

于鏡字照九乾隆甲子舉人負不羈才初應試學政
以其英華過露故抑之鏡下帷讀書期年不窺園著
有四書講義

王思用爲人謹厚武畧過人中乾隆己丑科武舉從
事戎行值山東臨清州逆匪滋事屢建大功曾不火
食者七日主帥深嘉獎之任信陽州千總

趙萬里字鵬程號忍齋例貢生以子慶雲貴贈宣武
都尉性孝方應試心忽動卽馳歸母已稱疾自此不
忍一日離遂絕意進取親歿盡禮盡哀三年中未嘗
見齒叔一事之如所生堂兄世昌入貢成均後旋里

目半盲萬里多方調治暇則取新書誦側以開其鬱
女兄弟不得其所周恤備至家設塾族黨中來就學
者均代具修脯又嘗言破家喪品莫甚於博乃著戒
博文延數村人誠諭之復于歲除具錢粟以爲獎勸
遇人告急輒傾囊相助至有籍列顯宦者萬里絕口
不道前恩山西關姓賈于陳密以千金寄存其子弗
知也關姓歿萬里召其子至備述前事以原金還有
執友負債至千數百金被逮酷追代償之無難色乾
隆五十一年歲大饑按戶給粟活人甚衆又好行陰
德城東南蕭家橋及洪山廟大橋橫壓蔡水歲久傾

淮寧縣志卷之十九

人物

四十九

圯蔡水逆流當盛夏時兩岸盡爲澤國萬里獨力捐
修沐其利者上下百餘里其他修橋修路給藥餌施
棺木歲以爲常暇則取忠孝經感應篇敬信錄端坐
誦習體之于躬嘗訓子弟曰傳家之道如點燈培養
陰隲如添油油竭則燈滅爾曹慎之嘉慶十年奉
旨各州縣建文昌宮慨然自任經營三載計捐費多
至三千餘金知府包率屬褒以匾額又若包公祠大
慈庵魁星樓文場號座凡有修建無不樂于趨事嗚
呼賢矣古之所謂鄉先生歿而可祭于社者其在斯
人與子五人長慶雲武庠生援例捐守備嘉慶十八

年歲歉慶雲遵母命首捐金二千兩煮粥賑濟爲邑
紳倡經巡撫具題奉 旨加一等頂戴嗣因滑縣教
匪滋事復捐金召募鄉勇他如修文廟絃歌書院畫
卦臺洪福寺金龍橋等工均克仰承先志殫心盡瘁
歷數年如一日次凌雲次祥雲皆武孝廉次瑞雲廩
生次青雲候選守禦所千總均能恪遵遺訓凡一切
義舉莫不爭先有碑記載集文鄉里重之

孟國彥字潛修號慎齋幼耽古家設塾多所成就爲
從叔置田宅爲世母營喪葬鄰里鄉黨急者周之乾
隆庚子舉于鄉甲戌揀發江蘇以知縣試用署高郵

淮寧縣志卷之十九

人物

五十

州除朶民之政及去任有攀轅泣下者後改官濟源
教諭有經師人師之目士林重之

季元峴字熙顯號冰亭由拔貢領乾隆丙子鄉薦少
負異才嗜學弱冠知名工詩文尤善書人稱三絕與
睢州蔣日綸西華張遠覽邑人錢廷文結社爲文遊
京師名益譟任光山縣教諭性嚴正人不敢干以私
治家整肅常述格言訓子弟鄉里宗之著有見廬積
草行于世

程永年字喬齡歲貢生性嗜學非應試足不履城市
爲塾師之宗

劉華躬字淑度由拔貢領乾隆庚寅恩科鄉薦生而穎異博學能文百家之書無所不窺教育生徒多所成就著有省吾堂詩草養正編時文稿行于世嚴高儒字西河歲貢生性穎悟讀書務求實得立品制行士林宗之中年課徒學規嚴肅門人成就者甚衆卒年七十有五

馮炎字蘊生歲貢生世敦孝友七歲卽有志讀書受業張體銓之門博學能詩尤工書法體銓深器之家貧課徒養親先意承志父歿居喪三年不飲酒食肉弟炳早亡遺妻王氏矢志自守炎善視之委曲周至

淮寧縣志卷之十九

人物

五十一

四十餘年如一日卒年七十有五孫元和歲貢生季乃恭監生乾隆二十二年歲飢煮粥以賑多所全活二十六年修城捐樓房數間又捐書院膏火邑令汪旌其門曰尚義急公

孔毓載字德厚幼從父學作文日數十藝入郡庠旋食餼家設塾訓子弟以清真雅正爲宗性孝弟同堂兄弟有告匱者恒合食焉壽登八十有三至今鄉里猶嘖嘖稱之

李啟明字東曉號峻峯領庚寅鄉薦文少有奇氣繼乃斂才就法以先儒語錄爲宗遊京師謁竇東臯先

生卽席次韻深契之由是名益噪孝廉張次仲歿于都下攜其柩歸年六十選汝州學正思以一官榮親蒞任三載旋告歸里有經師人師之目

喻傑字漢三太學生喻氏族繁衍待傑舉火者周之不少吝或無棲止則分宅與之女兄適勞姨兄李家中落傑爲制產中歲精岐黃有老婦依孫度日孫病求治于傑傑曰病非參苓弗治婦有難色卽售參與之王應碩者傑比鄰也爲債所迫將自經傑匍匐往救並出資代償有魏姓因貧鬻妻傑得其情力援之俾安于室古重敦族睦婣任卹如傑者殆其人與

淮寧縣志卷之十九

人物

五十二

律宗文字繼昌性慷慨修橋路施藥餌歲以爲常族黨中力不能婚喪者傾囊助之以故家中落一日流丐數百人具儀稱賀宗文却之衆曰我輩蒙周恤久矣如不受是絕吾儕也其盛德之感人如此

王天爵字元良幼讀書目數行下年十六遊庠旋食餼事母以孝聞後選洧川學博倡立義學鬻產爲諸生膏火值匪徒張仁滋事設策平之大憲嘉其才欲以知縣擢用以母老辭俄有怪狀如人形沿街呼嘯天爵祭以文怪遂絕有生員爭產訟于庭反覆理諭其人感至泣下晚年以目疾告歸著有析疑錄春雪

集三世良方藏于家今子孫書香不絕

謝去怠字敏修好善樂施積學未遇延名師課子弟
戚黨有貧不能就傅者給以修脯之資二十餘年不
倦乾隆戊寅歲大飢宗族中多鬻田產去怠按田給
值及年豐不取其值而悉歸其產鄉里稱之子三人
孫十五人書香不絕

趙士端幼耽古因足不良遂絕意進取弟負國課盡
鬻己產代償家設塾受業中知嗜學者酌給紙筆或
荒於嬉使供洒掃以愧勵之及門入庠食餼者踵相
接焉

淮寧縣志卷之十九

人物

五十三

魏燦字光斗以孝聞父患風痺日侍榻前以手暖其
四肢三年不懈疾乃瘳母目盲燦以舌舐之越四月
目能辨色弟歿撫姪如所生其他濟困扶危族黨多
有被其澤者年至八十有四

范思洛字書圖武生性剛方鄉里中排難解紛之事
莫不以身先劉東含在縲絏中知非其罪與趙萬里
保之得免難朱鳳來家貧將廢學思洛敦周急之義
俾至成名壽登八秩邑令丁旌其門曰鳩杖朝班
熊麟趾字聖瑞號雲峯廩生嘉慶庚午辛未疊次蒙
恩授翰林院檢討書法蒼勁流傳京師又善畫蘭竹

年八十燈下猶能作小楷固始教諭高派遠癸酉舉人王鶴年皆其高弟年至八十有九

喻長坦廩生品學皆粹著有學庸講藝兄早歿弟又多疾家產悉分給之自以筆耕餬口乾隆間有馬姓虧官項慨然以所積五十金贈生平與物無忤布政司江旌其門曰崇義尙德

齊渤捐職營千總邑令殷延往鐵門給發兵車口糧過王喬洞墜澗氣絕家人覓之聞澗下吁氣聲繫之出渤骨折不能旋轉家人負之失途見老媪紡績得詢歸路行數步回視燈舍俱絕矣乾隆丙午歲飢多

淮寧縣志卷之十九

人物

五十四

所周急嘗見舊佃孀婦李氏攜子女泣問其故知爲夫弟所鬻代償鬻價俾骨肉不離邑修鬻宮建文昌宮捐金併任其勞年至七十有五

張木字閻章廩生事父母以孝聞弟本早歿遺子三樂甫三齡三復乃遺腹子也木撫之教養備至嘗謂三樂曰爾讀書無成吾無以見爾父於地下言訖潸然流涕後三樂由廩生中嘉慶己卯副榜皆木之教也

王威字振九武畧過人壯從戎捕襄城紅石關盜平山東臨清州賊有功歷任扶溝淮寧鎮平經制外委

事母必以甘旨嚴冬無裘母憐之言血氣方剛如是而後體適所至緝捕有聲士民勒碑以頌並立生祠以祀之

鄧玉麟字繡紱祖克長父裔曾以忠厚世其家玉麟舉丁酉拔萃科由四庫館議敘分發江西歷署萬安永新吉水縣及九江府通判事所至有政聲丁父憂去職後揀發浙江補布政司經歷力持廉慎及歿宦橐蕭然弟玉相字蘊輝工書畫由廩生考授州吏目分發甘肅借補肅寧縣典史士民德之至有欲建生祠者丁父憂去職嘉慶四年揀發四川大經畧勒公

淮寧縣志卷之十九

人物

五十五

器其才擢給五品頂戴因解西藏軍餉歿于巴塘勞王事也

周申字容舒監生乾隆二十二年歲飢在北關設粥廠全活甚衆家設文武兩學造就人才嘗督修文廟絃歌書院各工生平好義大率如此

周甸字昀軒監生家素豐性豪舉輕財仗義親族鄰里有婚嫁喪葬事成貲助之乾隆三十九年重修學宮昕夕襄事邑中義舉莫不爭先子九人敬學乾隆壬子武解元孫冕增生

高量字雅涵由拔貢應京兆試北上時同人祖帳引

司馬題橋故事指其門而言曰不取青 不入此門
尋中庚申 恩科舉人教習期滿分發安徽以知縣
試用歷署建平英山盱眙等縣試士卷悉親校告歸
後家無長物可以知其亮節矣

李士錦字繡儒號絅菴幼病癰夢人刺其腹乃瘳性
初鈍及弱冠豁然開朗遂遊庠旋食餼肄業於絃歌
書院爲陳晴川中丞所歎賞居平篤于孝友女兄弟
適范適喻適劉探其貧爲撫其孤教養數十年俾各
得所其他敦族睦婣之誼指不勝屈子三長楷嘉慶
庚午舉人道光元年舉孝廉方正次桐庠生次楹癸

淮寧縣志卷之十九

人物

五十六

西拔貢可以徵其式穀矣

魏西美字懷音性孝友叔傑性嗜酒晚漸成疾西美
多方調攝隔歲始痊嘗語人曰微吾姪吾死久矣與
弟析居田產自取其瘠婣族有告匱者周其急鄉黨
有涉訟者解其紛女兄適傅無自存爲置恒產俾足
衣食今其子象書孫振清皆入郡庠可以徵其世德
矣

王方旦字旭齋庠生方張字景師增生父有痰疾母
失明方旦與弟朝夕扶持凡奉匱進盥之事皆身任
之親歿絕意進取家設塾來學者多所成就方旦性

友愛與弟同居至于白首門以內怡怡如也方張胸懷灑落見躡足附耳者恒恥之晚年精岐黃多所全活又嘗力援許氏孤兒以故見稱于鄉黨今子孫書香不絕

張仲林性寬和年六十無子囊金往鹿邑輿女王氏歸入門妻問之不答方知其啞妻怨之仲林曰今日之舉爲無後也啞何傷越歲生子大房先是戚黨中負仲林債者數千金至是悉焚其券仲林病大房甫四齡恐不克成立因以姪大智爲長嗣大房次之仲林歿大智爲弟延師更名遜如入邑庠仲林之妾王

淮寧縣志卷之十九

人物

五十七

氏守節四十年嗚呼可以風矣

楊東來字敏修邑庠生有至性嘉慶九年父歿未葬逾年正月園中火起東來跪伏柩前火益熾或扶之出慟哭不起左右前後屋三十餘間盡爲灰燼惟是屋屹然獨存孝所感也子凌雲郡庠生

李進孝農家子也父疾聽醫家言嘗糞可知生死卽就糞嘗之父歿不櫛髮及葬廬于墓負土營塚如是者三年子病置不問其子死移棺門外哭罷卽赴墓服闋後族黨強之然後歸與祭輒號泣壽至八十餘黃文錦字繡章少有志畧中乾隆戊申科武舉五十

六年經兵部揀選分發本省撫標効力嘉慶元年湖北白蓮教滋事隨巡撫景防邊勦賊有功奏聞賞戴藍翎補撫標右營千總又隨提督慶將軍永兩湖總督倭在湖北棗陽之迴龍寺竹谿之九里崗屢著勞績因受傷奉檄回豫擢守備旋升荆子關都司後調任襄城十七年有旨升廣西提標遊擊引見賞換花翎二十年升撫標叅將二十二年護越南國貢使進京回任後傷發以疾乞歸道光五年修邑乘文錦勦事採訪最廣或與談從戎舊事輕裘緩帶有儒將風六年正月以疾歿鄉里惜之

方伎傳

漢

郤巡字仲信陳郡人和帝時南陽樊英習京氏易兼明五經善風角算河洛七緯推步災異隱于壺山之陽受業者踵至巡傳其業仕爲郡博士會魏朗亡命從受春秋圖緯焉官至侍中

南北朝

袁蓓陳人師于陸蓓畫人面如眞宋鄱陽王妃劉與王伉儷甚篤王爲齊明帝所誅妃追傷過切成癆病醫不能療蓓乃畫王形像並圖王生平所寵姬共照鏡狀如偶寢密令娼妘示妃妃見乃唾之因罵曰斫老奴晚于是悲情頓歇病亦痊子質亦善畫筆勢勁健繼父之羨

五代

王仁壽宛丘人業儒性通敏頗涉文史亦潛心繪事初學吳生長于佛像神鬼及馬等嘗于京師淨土院大殿前畫八菩薩今見存焉

宋

王士元仁壽子好讀書有局量鄉里器之與國子博士郭忠恕爲畫友嘗爲孫四皓客甚見推重善畫木

石雲水頗師關同更加景趣尤善天廐馬雖驚駘疲劣亦能爲之骨氣高卑皮毛上下隨筆所定較無差處至御勒之飾飼秣之所皆可觀焉尤工屋宇臺殿嘗畫古時宮殿及綠珠墜樓圖二軸通博該備時人稱絕又能赤白及作松紋錦柱愈見壯麗先是唐有名畫斷第其一百三人姓名太宗多能留神度藝訪其後來復得一百三人編次有倫亦曰名畫斷孫氏謂士元曰上爲畫斷以續唐本子其謂何士元乃沈思默慮採唐諸家之長爲武王誓師獨夫崇飲圖見者歎曰王君之意與六經合觀其事迹不覺千古之

淮寧縣志卷之十九

人物

六十

遠非精慮八神何以致此孫不敢私以進于上下圖畫院品第之時高文進與士元有隙定爲下品止以三十縑爲賜識者憤之張文懿士遜惜其精筆奏攝南陽從事後仕至推官

閩士安宛丘人疎蕩嗜酒尤好作俳優語故爲豪貴所暱習醫術善墨竹及草樹荆棘上石摹蟹燕子等畫皆不用彩繪爲時輩所推故王冀公德用好蓄花竹畫士安盡其思慮獻墨竹圖甚見稱賞由是奏爲試四門助教士安之竹千怪萬狀有帶風煙雨雪之勢者尤盡其景

楊山人者逸其名蔡新州確黃大夫好謙爲陳諸生聞其善相過使相之曰蔡君宰相也似丁晉公然丁還而君死黃君一散郡耳然家口四十則蔡貶矣元豐末蔡爲相黃由尚書郎出爲蔡州過蔡而別問其家曰四十口矣蔡大駭曰楊生之言驗矣其後有新州之竄

懷居士名敏字仲訥宛丘人也少好醫自神農草木書黃帝內外經扁鵲倉公傳無所不覽遂爲醫博士爲人治疾數有效居數年厭之以其方授子孫並致家政築室獨居聚浮屠書讀之江湖淮浙浮屠氏之

淮寧縣志卷之十九

人物

六十一

遠者無不來歎王公大人多與之遊居士雍容上下不可疎旣七十舉累世不葬通別籍之喪二十餘躬理其事曰是責在我不當以累子孫子和孫邁皆守其方蓋三世云

明

鞏庸字友常陳州衛旗士好古玩早從張世祿學丹青寫人物山水綵鸞隨筆有致永樂間應召至京師與一時名畫角藝知名於時臺閣公卿多禮焉

劉冕字秉燹本淮陰人洪武初徙陳遼叅同契問疾施劑立效任州典科子謙孫玠咸嗣職

姜疇陳州衛人善禱雨嘉靖中歲大旱郡守使召疇
詞甚倨疇書一字于來使掌中囑令還報時始開比
行途中有雲一片隨其身大雨淋漓至見郡守晴日
當空方訝其衣之溼也一起手霹靂從廳事中起陰
雲密布大雨霑足因請見叩其術所從得疇言妻某
幼曾婢于張真人府中頗習之疇以軍貲赴江西因
娶歸得傳其術云周王門而召之求請關聖至講左
氏春秋甚詳又求遣真龍觀之龍降當以黑犬皮厭
送王戲用黑羊皮龍怒立殺疇汪揮使延齡侈談其
事

淮寧縣志卷之十九

人物

六十二

趙時獻陳諸生善書畫字中聲音點畫無不精考畫
人物宗張路山水宗戴文進翎毛花卉宗呂紀其最
佳者鷄也遠邇人購一幅以爲家珍焉自號練亭居
士年八十四卒

張儒陳州衛人善繪事工于寫真儒口吃吃而恢諧
有致搢紳先生樂與之遊後不知所之

國朝

孫垣字魏賢世醫也幼讀父書深得外臺秘要每診
一病能知病所自起縷陳經脉快人心脾令病者勿
藥有喜嘗言無不治之症要在治之得其道耳問道

安在曰症有萬變莫拘成方認症確用方活醫家諸書食之而化得焉矣

蔡璐字佩玉精於痘症晚歲目盲有延者以手按之卽知其輕重子思明猶世其業

孟行健字克猷精岐黃因母下樓傷足遂專意學接骨之術治痘症尤神貧乏者給以藥餌卒年七十有八

楊士賢字聖傳太學生精岐黃戚黨抱病有召必往嘗採古今集驗方合藥濟人屢著奇效有納金者悉還之乾隆五十一年歲大飢出貲以拯窮困說者比

淮寧縣志卷之十九

人物

六十三

之橋井云

楊百祿字在中精醫術處方用意幾似古人家設藥局鄉里相延雖暮夜必往及疾囑其子曰藥以拯人非以市利悉取賑焚之孫掄元增生積善之報也智思臻字希天爲人慷慨精於卜卜必奇中乾隆己卯命其子脩身後事謂族黨曰某月某日吾將去也至期正衣冠而逝可以徵其卜矣

孫溯沔字石言自號三元老人賣卜于西月城多奇中尤善梅花數有問數者得旅上九鳥焚其巢色沮老人曰問名則吉鳥焚巢飛騰之象也其人一戰果

捷

孫有仁良醫也少得父授後術益精知縣耀有政聲病既彌留有仁藥之三進卽愈酬以金有仁曰來醫之意爲民也何敢受賜力卻之知縣給額曰杏林春煦里黨求醫者日數十家一介不取晚年生子如蘭年至八十有五

彭天綸字道合幼讀父書工堪輿有延之者雖風雨必往後精數學嘗爲知縣耀占疾奇中給額曰可以前知

魯東木字輝先邑廩生衛守備文禮之季子也負性

淮寧縣志卷之十九

人物

六十四

孝友讀書以立身持己爲先晚年精岐黃有就醫者診脉畢令病者自言少未合卽復診視必悉合始立方以故多奇效遇貧乏并給藥資其他類多陰德今孫曾書香不絕

耆壽傳

張敬性溫厚于人無所憎惡父兄妻子皆年九十餘
歲乾隆四十五年敬年一百十有四歲知府赫知縣
劉申於上 恩賜昇平人瑞匾額並銀緞有差
范民魁乾隆四十六年辛丑年百有一歲奉 旨旌
表

陳士賢乾隆五十七 壬子年百歲五世同堂奉
旨旌表

李百川府學生乾隆六十年乙卯年八十六歲赴千
叟宴

淮寧縣志卷之十九

人物

六十五

李乘法字聖訓以醫世其家有就醫者合藥與之不
計值家蓄婢必爲擇配俾得其所年至九十有八知
縣焦給額曰五世一堂

靳如璋字譽望貢生事親以孝聞終身不求聞達乾
隆十九年修邑乘捐資勸事年至七十有九

方恂字子翼郡廩生幼嗜學足不履市廛者五十年
庶吉士鄭有則出其門一時從學者多所成就年至
九十有二

侯純字碩彥幼孤母有所需竭力承志母歿凡祭之
日輒隕涕乾隆五十一年歲荒多所全活有貸者不

責償年至八十有一
孫景曾字裕澤庠生讀書好善家設塾成就者七十
餘人年至九十有二妻王氏年至一百有三
季夢麟廩生天性醇厚生平無疾言厲色家設塾來
學者多所造就年至八十有四布政使江給額曰嗜
學修行

雷宏中性醇厚有佃人因貧鬻妻行有日矣哭甚哀
詢得其情代償鬻價俾終身完聚年至九十有一
高日震字長春幼力學父疾求療不愈喟然曰爲人
子者奈何不知醫博習經方遂精其術有黃氏子梁
氏婦病將不起親爲視藥尋愈家設藥局不計值貧
者不責償鄉里善者好之不善者勸誡之年至九十
有七

淮寧縣志卷之十九

人物

六十六

紀品儒太學生家素豐族黨中告貸貧不能償卽焚
其券乾隆五十一年歲荒捐粟以賑又嘗施廟地以
棺木給不能殮者年至九十有七都司楊給額曰頤
養冲和子大臣監生孫雲中武舉遇邑義舉捐輸恐
後蓋猶有父風云

穆建中字會嘉幼失恃家貧遂廢學費於周口交易
以信家漸豐承父志築堤以防水患設太平會以禦

火災他若虹濟橋躋壽院首倡捐修外又多陰德知縣邵給額曰薰德善良子四長浚次灃以秩貴次超太學生次清中嘉慶戊午科武舉年至八十

孔興銑乾隆二十七年修虹濟橋三十五年修搬醫口路經通判史給匾褒之年至八十有二子毓洲承父志嘉慶五年修躋壽院十八年捐貲賑荒復緣滑縣告警招鄉勇以衛商民現年八十

智萬子字伯英爲人寬厚處事接物卓乎有士君子風自奉素約周恤族黨未嘗少吝年至八十有五方景哲字仰賢性謹厚有告急者力周之好排難解

淮寧縣志卷之十九

人物

六十七

紛年至九十餘聞某構訟命子振高扶持而去卒以理釋道光元年歿年一百有三

陳鑛字琢章監生慷慨尙義鄉黨恒德之有涉訟者必爲排解年至八十

張運集性忠厚乾隆五十一年太康李九成因貧鬻妻行有日矣哭甚哀運集知其事給如其值俾夫婦不致離散年至九十四

王自明素樂善遇有喪者匍匐救之嘉慶十八年歲荒多所全活其他施茶施藥歲以爲常年至八十有

七

顧方舒性謹厚乾隆五十一年歲荒族黨賴以存活者十數人子尙義家設塾來學者多所造就束修弗計也今子孫書香不絕年至八十有九

鄭洞事母以孝聞乾隆五十年歲荒買族人田產越歲還其券嘉慶十八年歲又荒命長子庠生鳴謙次子鳴玉力周族黨年至八十有八

杜虎變業儒家設塾來學者未嘗無誨束修弗計也嘉慶十八年歲荒太康高姓因貧鬻女行有日矣哭甚哀虎變聞之代償其值俾不離散年至八十有五楊椿齡字延千少積學鮮兄弟嘗曰人子責無可分

淮寧縣志卷之十九

人物

六十八

身名一敗箕裘墜矣足不履塵市不忍離其親也精岐黃就醫者探其貧卽儲藥與之道光元年邑患疫廣布良方全活甚衆年至七十有九

勞開泰幼讀書屢試未售遂絕意進取父老且病侍奉蕩藥歷數年不倦遇媼族加意敦睦年至八十有

一

勞克崇庠生幼失恃事繼母以孝聞好讀書至老彌篤鄉鄰有鬪者聞克崇皆匿迹其爲人所敬化如此年至八十有一

勞克健庠生性孝友訓子弟以敦行爲本家設塾來

學者多所造就勲功趙生家貧將廢學以養以教卒
使人庠今克健子孫皆能世其德年至八十有四
薛峻德事父母以孝聞乾隆五十一年歲荒有佃人
鬻其子女峻德如其值週之俾完骨肉年至八十有
三

秦學瑗家貧所行多陰德娶妻氏錢夫婦皆年至八
十有四

勞迎歲貢生好讀書恬淡寡欲四方來學者多所造
就耄年猶說經論文終日不倦年至九十有七

勞登五武生工詩善畫戚黨告急力周之營兵畢萬

淮寧縣志卷之十九

人物

六十九

鎰從戎恤其家數年如一日年至七十有八

褚大用字可材性慷慨乾隆四十八年搬醫口西橋

壞獨力興修五十一年歲荒多所全活嘉慶十八年

鬻顧姓女詢知己字越歲召其父母至遣歸並助其

奩值兄大美大義家中落同其飢寒里黨告急者周

之不少吝子三人孫十一人曾孫十八人元孫一人

親見一堂五代年至九十有三

陳述字克緒監生重義輕財兼精醫術有延者未嘗

索謝遇貧乏者并給以藥餌之資卒年八十

鄧如蒼夙好義族有姑媳雙節者如蒼棄產代爲建

坊鄰里喪葬不舉竭力周之現年八十三歲
杜冕素恭兄析居時宅產自取其瘠鄉里或涉訟力
爲解紛現年八十有五

任克承夙敦孝弟嘉慶間修巒宮畫卦臺洪福寺皆
力勸其事現年八十

張育萬精岐黃術有延醫者雖風雨不憚勞現年八
十

陳守仁字統萬性廉介嘗于道路拾遺金待其人至
還之精岐黃術遇貧困者尤加意診治知縣沈給額
曰品重鄉評現年八十有一

